

IX.

De Chronologia Tartarorum & Mogolensium,

&

Necessaria Correctione adhibenda, in Numeris Chronologicis, qui exstant in libris impressis, de Historia Tartarorum agentibus.

Res Tartarorum quæ olim in obscuro latuerunt, jam variis modis illustrantur: Præsertim Historia eorum nobis accuratius innotuit, postquam Domini *Pétis de la Croix* Historia Magni *Genghizcani*, primi Imperatoris antiquorum Mogolensium & Tartarorum; & postea ejusdem Translatio Historiæ *Timur-Beci* sive *Magni Tamerlanis*, quam *Cherefeddin Ali*, Persa, non diu post Tamerlanis mortem congeffit, editæ essent. *Historia Genealogica Tartarorum*, in Gallicam Linguam traducta, cujus Autor fuit *Abulgasi-Bayadur-Chan*, Princeps Tartarus ex posteris *Genghizcani*, totam Historiam Tartarorum ab initio mundi, secundum eorum traditionem, ad Annum Æræ Christianæ 1665 continet; in editione hujus libri plures annotationes egregiæ additæ sunt, quæ Geographica plerumque illustrent & mihi valde placuerunt. Cum verò in omnibus hisce libris plures errores Chronologicos detexerim, quæ Historiam in plurimis locis confusam reddunt, operæ pretium duxi, eos hac occasione detegere, & indicare, quomodo illi sint corrigendi.

De Cyclo Tartarico.

Utuntur Tartari universi Cyclo quodam 12 annorum, & cuiusvis anno hujus Cycli nomen Bestiæ alicujus tribuunt. *Ulug-Beig*, nepos Magni Tamerlanis, & itaque ipse Tartarus, statim in Prolegomenis Dissertationis suæ *de Cognitione Epocharum*, agit de Cyclo duodecimpartium, quo Astronomi *Chataja*, & *Igúra* utuntur, diem civilem in duodecim partes dividentes, & cuiusvis parti nomen peculiare imponentes; & ibidem illa nomina tam in lingua *Chataia* quam *Turcica* exhibet.

Chataja